

QVÆSTIO MEDICA
 QUODLIBETARIIS DISPUTATIONIBUS
 MANE DISCUTIENDA
 IN SCHOLIS MEDICORUM,

Die Jovis 16. Novembris.

M. LUDOVICO LABBE
 DOCTORE MEDICO, PRÆSIDE.

An Oculorum doloribus Narcotica?

I.

OCULORUM fabricam qui non admiratur, oculis vel careat vel non utatur necesse est: tantâ arte & industriâ constructæ perfectæque sunt lucidæ illæ animi fores, seu fenestræ. Diceret duas esse stellulas capiti, & ad speciem atque ornatum, & ad vitæ usum simul ac dulcedinem affixas. Oculorum dignitatem arguit visus conditio, qui reliquis sensibus & agendi celeritate, & objecti nobilitate, & rerum quas repræsentat, varietate præcellit. Ad animi corporisque motus sese componunt, tantusque est illorum cum cæteris partibus consensus, ut quid in plerisque earum geratur, in oculis tanquam in speculo cerni queat, atque ut illi valent, valeat & corpus. Vix aliâ in parte major est particularum aut numerus aut apparatus: proprias habent non paucas, communes quam plurimas; omnes ad ejusdem functionis vel perfectionem, vel commoditatem, vel securitatem conspiciunt: his vivunt; illis sentiunt; aliis & ad dextram, & ad sinistram, & sursum, & deorsum, & in orbem, pro arbitrio moventur; Aliis rerum excipiunt franguntque imagines; nonnullis transmittunt & deportant ad animæ judicis tribunal. Faciunt interim cum ista partium diversitas & multitudo, tum ratio artificij singularis, ut oculi omnium maxime sint injuriis obnoxij, nec situs, nec orbiculata & ossea munitio, nec molis exiguitas, sat illos ab externis tuerentur insultibus, nedum ab internis.

QUOT & quibus subjiciantur tam morbis quam symptomatis, recensere arduum. Vel minimæ eorum particule plurimis & variis casibus patent; nervos impedit obstructio, convellit acrimonia, nimia humiditas emollit: humorum alij nunc deficiunt, nunc crassiores opacioresque fiunt: figuram alij sedemque mutant: sunt qui foras magno cæcitatæ periculo effluunt: extraneo etiam colore nuncnuncquam inquinantur. Membranam, quam adnatam vocant, imprimis urit Ophthalmia, infestat Epiphora: Eidem contumacius adhærescit membranula, quæ unguis instar à majore exorta angulo ad pupillam usque sese interdum profert; Corneam modo densari, modo nubeculis, maculis, phlyctænis, ulcusculis non infrequenter malignis, vitiari, exedi, & rumpi quis ignorat? pupillam dilatatio & tabes, seu immutatio corrumpunt. Musculorum motus variis ex causis depravatur, imminuitur, perit. Sed affectuum, qui adeo numerosi in oculis cadunt, nunquam difficilior cura quam cum ad illos doloris fit accessio, cujus, si ullibi, in oculis sanè ut magna vis & acrimonia, sic & calamitosa est consecutio; ejus interventu mirum quam invalescat primaria affectio, humorum cietur in partem afflictam aut novus, aut multo quam antea major influxus; ipse oculus incallescit, pulsar, rubet, intumescit, ac sæpe votum est, ne totus suâ ex orbitâ extrudatur; febris accenditur; urgent vigilæ; corrumpitur sanguis; spiritus, viresque absumuntur, ut oculo dolenti corpus universum condoleat, & communem trahatur in ruinam, quam, nisi dolore sedato, nunquam summovebis.

III.

QUANTA sit doloris in oculis sævientis atrocitas quisquis nescit, sibi tantum ponat ob oculos, & horum delicatissimam texturam sensumque exquisitissimum, & illius parentes causas. Doloris in universum nec una causa est, nec una statuitur differentia; alius gravis & obtusus, alius pulsans, lancinans, distendens &c. Qui oculos male vexat plerumque est acutissimus, & ab humore fit aut acido, aut acri, aut falso, aut saltem multo, penè semper tenui, & seroso, ex arteriis lymphaticis vasis, glandulisve in eorum irruente membranas, quas adeo immaniter, vel pungit fodicatque, vel distendit, ut è fortissimis non pauci doloris intolerabilibus aculeis victi manus sibi intulerint: hinc etiamsi dolor è symptomatum sit censu, nec symptomatum prima debeat esse curatio, si non omnem, præcipuam saltem medentis cogitationem & diligentiam ad sese convertit. Ubi itaque oculum excruciat motus ille asper à sensibus alienus, explicanda quam primum & in usum adhibenda omnis anodynorum supellex, incisa venâ sanguis liberaliter mittendus, fomentis blandiendum ferocienti malo, ef-

ferus & mordax ichor, partim clysteribus evocandus in alvum, partim temperandus: phænigmis, synapismis, vesicatoriis, cucurbitulis ponè aures & interscapulio ad spinam utrimque affixis, ipso etiam setone revellendus, educendus. His si desit successus, an aliqua purgationis opportunitas? an balneo locus? Plurima certe narcoticorum necessitas nec prætermittenda occasio.

IV

OCULIS dolentibus narcoticorum usu qui semper interdicat, durus is & carnifex videri potest; qui raro, nec unquam inter initia permittit, meticulosus nimis, ac sæpè numero morbum nutrit morâ præsidij, & adolescere oscitanter finit. Magna est & vulgi opinione multo amplior exhibendorum narcoticorum tempestivitas; omnium ferè sunt illa temporum & ætatum, nec usui duntaxat in extremis aut doloribus aut morbis. Suis te spiculis pungere occipit dolor? In promptu præstoque sunt narcotica quæ primam eorum aciem obtundant, ponantque obicem, nè altius insigantur. Augetur ille, viget, sævitque acius? Narcoticis seu compedibus evestigio vincendus. His ne quid efficacius quæras, nè in fabulis quidem: His & Homeri Nepenthe & Circes poculo citius, certiusque consopitur: His spiritus ferocientes & tumultuantes coercentur; viscerum humorumque æstus, etiam febiles, residunt; sistitur infestus ichor qui in oculos ruit; discutitur qui illapsus jam est, iisque inhæret; uterque seu acidus seu acer, frangitur & emendatur; officiosâ demum fraude fallitur ipse partis dolentis sensus, & suavissima malorum oblivio somni accessione procuratur, huic etiam finito, futura interdum superstes. Sed quod mireris magis, dolorum quandoque vacuitas est ab usurpatis narcoticis, nec inducto adhucdum somno, nec postea inducendo.

V.

ABSIT itaque inanis ille narcoseos metus, qui multorum mentes hæcenus occæcavit. A narcosi quamquam est narcoticis nomen, narcosim tamen ea inferre ne putes, si prudentis medici consilio, & quâ decet offerantur manu. Nec te deterreat moreturve plethoræ, vel cacochymix nondum penitus exhaustæ religio, utrivis enim quid adjiciunt narcotica? quæ si distuleris, doloris ingravescentis perenni aculeo, & ipsa in horas crescit geminaturque impuritas, & nisi totius corporis, partis saltem dolentis aut dolenti proximæ, privata plenitudo succrescit, circuitu sanguinis impedito. Narcoticorum multiplex species. Frigori exuperanti vim suam nulla debent; calent etiam eorum plurima contrariivæ partibus constant. Quibus illa insideat sulphureisne, an salinis, vel utrisque, & quo agat modo, obscurum, atque ex earum est numero rerum, quæ animos latent temperatos, curiosis imponunt. Omnium potentissimum & maximè usitatum Opium:

Huic è terris novo sole calentibus , in nostras advehendo , corrigendoque quam impendis operam , parum abest quin perdas ; quamvis fortasse diversum sit à Thebaico nostras , nec ad venerem ac martem stimulos & calcar addat , cæteris tamen , quibus illud , usibus inservit , nephriticis , colicisque doloribus admirabiliter prodest : Hæmorrhagiam , diarrhæam , dysenteriamque compescit , dysuriæ , stranguæ , arthritidi , rheumatismo medetur , & si quæ adjicienda animadversio , ea fermè una esse debet , nè quid nimis . Id verò narcoticis palmarium est quod & intro sumi , & extra admoveri oculis possint : Usus eorum interior scrupulum movet , scrupulo exterior vacat , præmittatur . Hic non respondet votis illius fac periculum , quod cum discrimine nunquam , sine successu vix unquam fiet , si modum tenes . Quam crebro in usu apud veteres fuerint narcotica , evincunt tot ab ipsis inventæ , & literis consignatæ narcoticorum formulæ , tot præscripti eorum præparandorum modi , tot excogitata & celebrata collyria , quæ opii , hyoscyami , mandragoræ , psyllii admixtione gaudent , usque acceptam potissimum ferunt famam & commendationem suam .

Ergo Oculorum doloribus Narcotica.

DOMINI DOCTORES DISPUTATURI.

M. Guillelmus Lamy

M. Petrus Ton.

M. Antonius de Saint-Yon
Medicus Regis ordinarius.

M. Claudius de Quanten.

M. Ioannes Robert.

M. Ludovicus Gayant Medicus
Regis ordinarius.

M. Nicolaus Lienard.

M. Philippus Dauté.

M. Nicolaus Morin.

Proponebat Lutetiæ PHILIPPUS TOURBIER, Peroneus
A.R.S.H. MDCLXXIX.

PARISIIS,
Ex Typographiâ FRANCISCI MUGUET , Regis ac Illustriss.
Archiepiscopi Typographi.